

ob er dazu rechten Beruff gehabt / vnd demselbigen auch
recht gefolget hab / oder nicht / Wird er aber solchs nicht
gnugsam beweisen / so mag jederman von im gedencen vnd
sagen / was er weis vnd wil / Ich fur mich kan von im an-
ders nicht halten noch sagen / denn das er der Kirchen Chri-
sti mehr schadens gethan hat / denn alle ire Feinde bis das
her haben thun können/sie heissen wie sie wollen / vnd seien
auch wer sie wollen. Was mich aber dazu bewege / vnd
verursache / solches von im zu halten vnd zu sagen/das mag
ein jeder aus dem / das im folgenden andern Teil dieser
Schrift angezeigt werden sol/vernemen.

Das ander Teil.

Wisdaher hab ich angezeigt / das vieler
Land vnd Stedte Kirchen/sampt iren getrewen Dies-
nern / vnser lieber Herr Gott/ zur aller gefehrlichsten
zeit des Interims/on allen rath vnd hülffe des rhumrettigen
Wenden. Glacij gnediglich erhalten hat / das sie mit irer
Christlichen religion gleichwol nicht ganz vnd gar zu grund
verheret vnd eingerissen worden sind / Dafür alle frome
Christen Gott dem Barmherzigen trewen Vater vnser lie-
ben Herrn vnd Heilands Ihesu Christi / billich ewiges lob
vnd danck sagen solien / durch Christum / vnd bitten / das er
vmb desselben seines lieben Sons Ihesu Christi willen/ sie
hinfortan in der erkentnis seines Sons gnediglich erhalten/
vnd darinnen teglich zunemen vnd wachssen lassen wölle/
damit das Reich seines lieben Sons gemehret/vnd viel mens-
chen darinnen selig werden mögen/Amen.